

•sanjvwnz•

Daeuhfouhhaeu

臭豆腐

□ Luz Lilanz / 陆丽兰

Daeuhfouh faen miz daeuhfouhhaeu caeuq daeuhfouhyouz……

Seizneix gwnzhaw miz yiengh daeuhfouh he heuhguh “daeuhfouhhaeu”.

Gaiq daeuhfouhhaeu hung lumj aen habfeiz neix, goengfaen ndeu na, gaem youq gyangfwngz unqmommom, miz saekndaem caeuq saekhau song yiengh saek.

Gyanghaemh byaij hwnjhaw bae youz, gyaegyaecouh miz gij heiq daegbied he biu haeuj ndaw ndaeng daeuj, haefwdfwd. Gaen gij heiq neix byaij bae, youq baihnaj couh raen miz aen diemq ndeu, aen diemq bakdou baihgwnz raiz miz “daeuhfouhhaeu” sam cih saw hung, saw hung baihlaj sij “maenz ngaenz sam gaiq” seiq cih saw iq. Aen diemq daeuhfouhhaeu baihindaw mbouj suenq gvangq, aiq miz cib bingzfueng baedauq, miz song aen daiz cuengq gaenh ciengz. Haujlai vunz ndwn youq bakdou deq cawx daeuhfouhhaeu.

“Cungj daeuhfouh neix haefwdfwd, baenz-lawz miz baenzlai vunz cawx gwn ni?” Ngeix daengz neix, gou couh byaij gvaqbae yawj, goeng lauxbanj he riuhaha caeuq gou gangj: “Dahnuengx, cawx daeuhfouhhaeu lwi, ndeigwn bw.”

“Mbouj cawx lo, haeu lai.” Gangj le gou couh riunyumnyum byaij deuz lo.

Miz ngoenz he, gou daiq daeglwg gou bae haw youz, cij mup dawz gij heiq daeuhfouhhaeu, gou gaem fwngz daeglwg couh yaek byaij deuz, daeglwg beng genbuh gou mbouj byaij, de naeuz: “Meh, baihnaj miz vunz gai daeuhfouhhaeu, raeuz bae cawx di he gwn ha?”

Gou doeksaet yat: “Yo, cungj heiq neix baenzlai haeu, mwngz gyaec gwn ha?”

“Mbouj haeu ha, mwngz mup raen haeu hoeng gwn haeuj bak couh mbouj haeu lo, gaxgonq daxboh cawx hawj gou gwn gvaq, gou raen ndeigwn dangqmaz ha.” Lwg gou naeuz.

Dingq de gangj yienghneix, gou couh daiq

de byaij coh naj bae cawx lo.

“Lauxbanj, cawx cib maenz daeuhfouhhaeu he.” Daeglwg gou naeuz.

“Ndae, caj di he.” Goeng lauxbanj gangj.

Goeng lauxbanj neix baez gaiq baez gaiq daeuhfouhhaeu geq roengz ndaw cauq cang youz bae caq, gij youz ndaw cauq dekcaca. Gou youq henz raen haeu lai, gyaec ngunhgangngang yaek bae mbouj dwg yaek dauq mbouj baenz. Yaep he, daeuhfouhhaeu caq baenz lo, de aen aen habhau ndeu cang ndei cuengq roengz ndaw daehhau bae ndenq hawj gou, gou youq daehvaq mbon ok cib maenz ngaenz hawj lauxbanj le couh fung ndaeng bung bak daiq daeglwg dauqranz lo.

Daengz ranz le, daeglwg gou couh dawz hab daeuhfouhhaeu cuengq youq gwnzcong hai okdaej, aeu gouhdawh ndeu nep gwn nep gwn, naj riunyumnyum lumj duj vafaiq ang hai nei. Raen gou mbouj gwn, lwg gou naeuz: “Meh, mwngz mbouj gwn ha, caen ndeigwn go, mwngz daeuj cimz yawj ne.”

Yawj lwg gou aj bak gyoepgyoep gwn ndaej diemzsubsub, gou couh gaem gouhdawh ndeu nep gaiq daeuhfouhhaeu he dwk haeuj bak daeuj.

“Dai lo, baenzlai haeu guhlawz ndwnj roengz dungx bae ha?” Gou ngeix. Hoeng aen feihdauh neix gingqyienz miz di…… Caengz dwk haeuj bak gij heiq haefwdfwd, dwk haeuj bak le couh bienq ndaej homrwgrwg, caen ndeigwn dahraix ni. Raen neix, gou couh gaiq doek gaiq nep haeuj bak daeuj, yied gwn yied ndeigwn, dingz cungj dingz mbouj ndaej.

Youq ndawbiengz, miz haujlai saehndei couhdwg yienghneix, raeuz mbouj caengz rox de seiz cungj nyinhnaeuz de dwg saeh mbouj ndei. Youq gwnzbiengz, miz haujlai vunzndei hix dwg yienghneix, raeuz mbouj caengz caeuq de dox baedauq seiz couh nyinhnaeuz de dwg vunz rwix. Saeh miz it ngeih, yawj ndei cij gangj, vunz miz ndei rwix, raen gvaq cij rox.

Ngoenzngoenz Cungj Youq Ndaw Fwen Gvaq

天天都在歌里过

□ Cinz Siengzcouh / 覃祥周

Ranz gou Doenglanz caen lienghlih(gyaecunde),

Gwzming laujgih hai va moq;

Sevei doxhuz onjfofo,

Vuenyungz swnghhoz gyaec lumj fwj.

美丽东兰是我家,革命老区开新花;

社会和谐又稳定,幸福生活美如霞。

Funggingj gyaecunde suenq Gyanghnanz,

Gaiq raeuz Doenglanz hix cei hoengz;

Gizlawz dwg sien guh baenz goeng,

Yawj Dahraemxhoengz Vandaih'it.

风光秀丽数江南,奇妙之处在东兰;

鬼斧神工在哪里,看红水河第一弯。

Bya ndei raemx ndei deihfueg ndei,

Dieg bauj mbouj sei(gangj) vunz gag rox;

Youz mbanj cienghginh mbat ndeu moq,

Doh boux mbouj gyoh bae Suhhangz.

好山好水好地方,物华天宝好风光;

将军故里游一趟,不必再去苏杭。

Ngoenzngoenz cungj youq ndaw fwen gvaq,

Baihgwnz baihlaj sing doxhan(hap);

Caesim yunghrengz doengz fazcanj,

Mocnauj ngoenz van bae coh ngoenz.

天天都在歌里过,这边唱来那边和;

齐心协力共发展,奔向美好新生活。

74. Cam:

Va lawz hai okdaej,
Ngaemgyaeuj coh daengngoenz?
Va lawz hai ok daengz,
Lumj baenz aen loxlez?

Hoiz:

Gveizva hai okdaej,
Ngaemgyaenj coh daengngoenz.
Caemqcaej va hai daengz,
Lumj baenz aen loxlez.

75. Miz duz cwzdaeg ndaem,

Gaemzgaemz gwn nywj geq,
Gwn liux cae mbouj beh(rag),
Ninz ndawgeh gutgaeuz.

(Fagdaeq)

76. Hak deuz vut gingsingz,

Seiq lwg bing ma hoh,
Vaizdaeg roengz lwgcoh,

Vah Duenz

谜语

□ Soucomz Cingjleix Veiz Daz

Mwngz raen goq(gvaq) mbouj caengz?

(Aengiuh)

77. Ndip gwn ndaej,

Sug gwn ndaej,

Cuengq roengz heng bae heh mbouj ndaej.

(Raemx)

78. Gwnz byoz em,

Laj byoz em,

Haethaemh cungj doxceng.

(Bwnda)

79. Sam beixnuengx,

Cug diuz sai,

Ok roet mbouj lau dai.

(Bauq va / Bauq diet)

80. Vaiz miz seiq gok,

Roengz raemx hwnjma couh deng bok.

(Faengx)

81. Guenq lawz dauqdingj venj?

(Ndaeng)

(11)

